

臨晉縣志

趙昌燮題

臨晉縣志

臨晉縣志卷九

錄二

鄉賢錄上

通志於祀典所及者歸鄉賢於政績可述者歸仕實截然
兩錄所以崇祀典記宦蹟也攷王志雜記李若拙論臨邑
鄉賢名宦病其僅有祠在從可知兵燹以後入祠之鄉賢
姓字事蹟乾隆時無徵者已多矣茲編不拘祀典亦不盡
仕宦凡耆舊先達行誼可傳載在通志舊志及近今採訪
者略次時代叙而錄之若忠烈孝友義行文儒固皆鄉之

賢者特又分類記載以便觀覽云

按臨虞兩邑忽併忽分今虞志成書凡虞志已載者似可弗錄然如張玄素趙叡仲董晉麻秉彝麻革諸賢爲臨爲虞究無從辨且清乾隆時臨虞早分王志仍繫於臨不聞議其掠美今宜仍之又如柳楚賢柳沖羅道琮范希朝劉綜高錫高冕等多見於臨舊志及通志皆稱爲虞人而虞志不載今宜錄之至於司空輿司空圖王桂則皆自臨遷虞者固宜臨虞並記也

王卓字世盛北解人父毛爲河東太守征西大將軍卓沈

毅有氣節歷仕魏晉累官河東太守封猗氏侯

詳金石記
順撰碑

以上晉

陳茂字延茂

本傳
猗氏人

高祖爲隋國公引爲寮佐每令典家

事未嘗不稱旨後從高祖與齊師戰於晉州賊甚盛高祖

將挑戰茂固止高祖忿之拔刀斫其額詞氣不撓高祖厚

加敬禮委以心膂及受禪拜給事黃門侍郎轉益州總管

司馬進爵爲伯

詳隋書本傳
及金石記

陳政字弘道茂子倜儻有文武大略善鐘律便弓馬授兵

曹承務郎後歸唐卒於梁州總管

以上隋

張玄素虞人隋景城縣戶曹竇建德俘城將殺之邑人千餘號泣請代曰此清吏殺之是無天也乃釋之隋亡仕唐諫治洛陽宮太宗詔罷役賜綵二百匹魏徵名鯁挺聞玄素言歎曰張公論事有回天之力可謂仁人之言哉歷太子少詹事遷右庶子屢遷銀青光祿大夫行左庶子時太子承乾事游畋不悅學玄素上書屢諫太子怒遣刺客伺之太子廢玄素坐除名頃之召授潮州刺史徙鄧州高宗時致仕

詳唐書本傳

裴寂蒲州桑泉人隋侍御史晉陽宮副監與唐公厚善勸

舉義師隋帝禪位寂開陳符命督太常具儀唐公曰使我至此者公也拜司空帝每巡幸必委以居守貞觀初太宗郊天以寂有佐命勳使與長孫无忌並升金輅嗣以罪免官卒嘉舊勞贈秩

詳唐書本傳

柳楚賢虞鄉人莊孫大業中爲河北縣長堯君素據郡楚賢說曰唐公名在圖籙動以誠信豪傑景附天所贊也君子見幾而作俟終日邪君素不從楚賢潛行自歸授侍御史貞觀中持節冊拜突厥辭其遺不受厯交桂二州都督杭州刺史皆有名

通志

趙叡仲虞鄉人隋東平將軍顯號之立孫唐號王府參軍
徵之子志行朗異以孝聞天后時應明堂大禮科上異其
對授陝縣尉轉平遙尉有治聲署同州西河丞奸吏聞風
逃竄郡縣胥資翊贊贈太常卿子孫皆有宦績

通志

董晉字混成虞鄉人擢明經肅宗時拜秘書省校書郎累
遷祠部郎使回紇有辯才崇國體德宗時李懷光欲與朱
泚合晉說懷光襲取賊清宮以迎天子懷光及將卒皆泣
拜遂不助泚以尙書左僕射同中書門下平章事爲宣武
節度副大使知節度事李萬榮死鄧惟恭總其軍晉受命

不以兵衛及汴郊惟恭始出迎謁既入卽委以軍政無所
改盡罷幕下勇士衆服晉有體惟恭潛謀晉覺之殺其黨
械惟恭送京師詔拜汝州刺史晉廉愿儉簡事多循仍故
軍粗安卒年七十六贈太傅諡恭惠子溪字惟深亦擢明
經三遷萬年令終東道行營糧料使

選

詳書本傳及通志
韓昌黎撰行狀載文

范希朝字致君虞鄉人初爲邢寧軍別將以戰守功累遷
御史中丞治軍整毅節度使韓游環畏其才希朝奔鳳翔
上召寘左神策軍貞元四年使代游環希朝曰始偪而來

終代其任非所以防覬覦而安反側也固讓俄遷振武節度使部有肆掠者謂之刮城門希朝度要害置屯堡嚴斥邏雖竊賊亦殺無赦鄙民以安虜人憚伏邊州長帥至必效橐駝駿馬希朝一不納貞元末請朝時諸鎮不朝自述職者希朝而已憲宗時爲河東節度使討王承宗敗之還朝改左龍武統軍以太子太保致仕卒贈太子太師諡忠武希朝號當世善將或比之趙充國在朔方招沙陀千落衆萬餘其後用沙陀戰者所至有功

詳唐書本傳及通志

薛謩臨晉人祖繪絳州刺史有治績封龍門侯父矩大理

丞謩宏深莊重幹敏絕人由崇文生荐授御史大夫充京兆水運使謩通吏治而習邊事具舟楫募壯勇且便弓矢者爲榜夫千餘人制如舟師每發粟泝河北上涉戎落以饋緣邊諸軍必克期至一歲中省費萬計遷福建都團練觀察使因俗爲治五州民咸悅

通志

李純夫隱居不仕構了了庵亭於王官谷貽溪之上玄宗召之不起號孤雲子

通志

按王志云李純夫元人幼登進士棄官隱王官谷於貽溪構了了庵自號孤雲子或曰純夫明鍊師雲遊士也

又攷虞鄉新志謂純夫本燕山人弱冠登進士棄官雲
遊於王官谷構了了庵號孤雲子大德二年卒檢科名
譜進士類無其人通志指爲唐時人不知何所據今從
通志待攷

司空輿虞鄉人有風幹當大中時盧宏正筦鹽鐵表爲安
邑兩池榷鹽使先是法疏闊吏輕觸禁輿爲立約數十條
莫不以爲宜

通志

司空圖字表聖輿之子也咸通末擢進士禮部侍郎王凝
爲主司特加獎待凝貶商州圖感知已往從之凝起拜宣

歛觀察使辟置幕府召爲殿中侍御不忍去凝府臺劾之
左遷光祿寺主簿尋遷禮部郎中黃巢之難間關至河中
拜知制誥景福中拜諫議大夫不赴昭宗在華召拜兵部
侍郎以足疾固辭會遷洛陽召入朝圖陽墜笏趣意野耄
柳燦知無意於世乃聽還圖本居中條山王官谷有先人
田遂隱不出作亭觀素室悉圖唐興節士文人名亭曰休
休作文以見志因自目爲耐辱居士預爲冢棺歲時祠禱
與閭里耆老相樂王重榮父子雅重之數饋遺弗受嘗爲
作碑贈絹千匹圖置虞鄉市人得取之一日盡時寇盜所

過殘暴獨不入王官谷士民依以避難梁初召爲禮部尙書不起聞哀帝弑不食卒年七十二圖無子以甥爲嗣嘗爲御史所劾昭宗不責也綱目胡氏云唐末進退不汚者惟司空圖一人其猶在韓偓之右乎迹近而意遠情深而罪微此蔡邕伍瓊周愨之所難也詳味其事想其爲人嗚乎其可謂賢哉

詳唐書及通志

以上唐

劉綜字居正宋進士虞鄉人少依外兄通遠軍使董遵誨遵誨嘗遣貢馬太祖嘉其敏辨厯官河北轉運副使嘗言州縣幕職官以昏耄放罷者其間實有廉謹之士全藉廩

祿以濟朝夕望自今並除致仕官又言法官斷獄皆引律令及其奏御復云慮未得中別取進止殊非一成不變之道望降旨約束時靈州孤危獻言者或請棄之綜言靈州民淳土沃爲西陲巨屏所宜固守以爲扞蔽然後於浦洛河建軍城屯兵積糧爲之應援此暫勞永佚之勢也俄充河北轉運使獻議於鎮戎軍置屯田務時兩河用兵邊事繁急轉漕之任尤所倚辦上眷矚甚厚警急輒資其奏處號爲詳練景德中擢知孟州召還復知并州以政績聞州民乞留優詔嘉獎歸朝知審院改吏禮二部郎中祥符中

館伴契丹使因作大雪歌以獻卽命知貢舉俄權知開封府以未疾命知廬州授右諫議大夫卒綜強敏有吏材所至抑挫豪右振舉文法時稱幹治子建中正中並贊善大夫弟綽進士刑部郎中

通志

高冕字子莊虞鄉人周顯德中詣闕上書稱旨擢諫議大夫宰相范質以爲超擢太過特授將仕郎守右補闕賜賚加等宋初官膳部郎中出知益州

以上宋

麻秉彝字仲常金皇統九年進士初爲西京市令革舊弊折豪強除大興推官盜賊旁午繫者累如秉彝悉平決之

世宗嘉嘆推官品第七乃陟爲第六自秉彝始時繕修宮室火禁甚嚴有百夫長禍一役投火鑱鐵石以火考送府獄其鑱石裏以奇帛秉彝曰貧人安得此廉得百夫長之子所衣帛正同誣雪調岳陽縣令時洪洞趙城爭水渠部檄秉彝查勘司水者十餘人贓賄狼藉盡寘於法自是無訟二縣民刊石以紀擢右三部司正令吏折獄多平反時夏人以賜馬貿物歲爲常彝曰非體也禁之攝行宮六部主事卒年四十九贈朝請大夫男爵秉彝爲政主仁濟以強明性敏悟八歲知屬文王彥潛學士評其詩似杜牧之